

«Mintga vusch è elementara»

Partida liberaldemocratica dal Grischun

DA GION NUTEGN STGIER / ANR

■ **Senza ina cuntervusch ha la pld grischuna nominà cusseglier guvernativ Christian Rathgeb per ina reelecziun en la regenza. La partida cun la pli gronda fracziun en il parlament chantunal vuler suenter las elecziuns chantunalas dal 2018 restar quai.** Ospitant dals liberals grischuns è stà *Gion Lechmann*, il rector da la scola chantunala, quai cun avair lieu la radunanza da nominaziun en la chasa «Cleric» a Cuira, in bajetg da la scola chantunala. En ses pled da bainvegna ha el ditg che la pld grischuna saja adina stada in partenari fidà envers la scola chantunala en dumondas da sustegn, furmazium, scolaziun ubain er credits da sanaziun.

En tut las regiuns

La pld haja ina clera finamira per las elecziuns dal parlament en set mais, ha ditg *Bruno Claus*, il president chantunal. Da preschent haja la pld 36 deputads e deputadas e saja uschia la pli gronda fracziun. Quai duess ella er restar suenter las elecziuns chantunalas dals 18 da zercladur 2018. Las vistas sajan bunas cun 80% dals deputads e da las deputadas sa metter a disposiziun per ina reelecziun en il parlament grischun, accentuescha Claus. Ultra da quai saja la «segunda garda» pronta da far il zap en il cussegl grond. «Nus essan en ina situaziun plaschaivla d'avair en tut las regiuns buns e capabels novs candidats e novs candidatas», ha menziunà Claus.

Daventar pli activa en Surselva

Da mantegnair il dumber da fracziun cun 36 deputads e deputadas na saja en nagin cass simpel, punctuesch Claus. Pli activa vulesch la pld daventar en Surselva, cunzunt a Flem, Glion e Mustér. Il potenzial da novs commembers saja avant maun per er far en Surselva dapli vuschs ed

eventualmain er gudagnar in sez vitiers quel da *Lorenz Alig*. Pli difficila sa preschenta la situaziun en l'Engiadin'Ota cun na pli candidar intgins deputads e deputadas per ina ulteriura perioda d'uffizi. Las secziuns localas e regionalas da la pld sajan dentant gia fitg activas en l'Engiadin'Ota e vegnian a preschentar ferm novs candidats e novs candidatas, menziuna Claus. En las Vals dal sid, cunzunt en la Mesolcina, haja la pld bunas schanzas d'avair success e gudagnar anc in sez vitiers. Il medem vala er per Cuira nua che la paletta dals candidats e da las candidatas saja gronda.

Da nossa vart nagina pressiu

La reelecziun da cusseglier guvernativ *Christian Rathgeb* saja bain plitost ina chausa formala, manegia Claus. La finamira saja clera, duaia el vegnir reelegì cun in fitg bun resultat. Quai che pertutga ina

midada da departament per Rathgeb na vegnia da la vart da la direcziun da la pld nagina pressiu. El maina exemplaric il departament da giustia, segirezza e sanadad e sa chatta bain en quel departament uschia ch'ina midada faschess strusch senn, ha ditg Claus. Da diversas varts vegnia adina pretendì ch'il cusseglier guvernativ da la pld haja da manar las finanzas, la realitad saja dentant che mintga persuna ch'appartegna a la regenza haja d'esser abla da manar il departament da finanzas, menziuna Claus.

Real e na populist

Cun sa dulzar da las sutgas e cun in grond applaus han ils 100 delegads nominà *Christian Rathgeb* sco sulet candidat da la pld per ina elecziun en la regenza. El è sa mussà fitg ventiraivel da quel gest ed ha ditg: «Grazia fitg per vossa gronda fidanza, per vossa bainvulentscha e per voss

sustegn.» El vegnia vinavant a far ina politica reala e na populistica, intensivar anc pli fitg ils buns contacts tar la populaziun, tar ses collegas d'auters chantuns ed er tar Berna, ha menziunà Rathgeb.

Passiun e plaschair

El vegnia vinavant ad esser cusseglier guvernativ cun passiun e plaschair, quai che sajan duas premissas impurtantas per far politica. En il sector da sanadad n'exista nagin spazi liber, l'unica via saja da cumbatter en in cuntin, cunzunt quai che pertutga il provediment da sanadad en las regiuns. Quel vegnia er ad esser dasper la segirezza in dals temas principals en ses cumbat electoral, ha ditg Rathgeb. Er per el vala: «Mintga vusch è elementara.» Per quai vegnia el gugent e cun plaschair a visitar tuts las regiuns ils proxims set mais. «Esser preschent tar ils electurs saja il A ed il O», ha punctuà Rathgeb.



Cusseglier guvernativ Christian Rathgeb (a san.) cun Bruno Claus, il president da la pld grischuna.